

Plenchi

Bèl a bati

Bèlèm bèlèm. TRINGG TRINGGG bèlèm..... TRINGG TRINGGG bèlèm.....Nos ta kla ta wardabu pa subi nos plenchi. Ta hopi informashon positivo nos tin atrobe pa bo. Siman ku a kaba nos a selebrá siman di skolnan katóliko. Nos mester di simiya di amor, simiya di respèt i simiya di pas.

Ya nos ta na porta di otro fakansi di skol. Fakansi di Pasku Grandi. Asina e aña eskolar ta yegando su fun. Ban dera trèt pa nos kaba e aña aki dunando 100% na nos tareanan. Nos mester duna lo máksimo pa nos por logra.

Un felis siman pa bo. Pone un sonrisa riba bo kara, esei ta e bistí di mas elegante ku tin na mundu. Laga pa ora nan topabu nan mira den bo un fuente di amor. Hari ku bida durante di bo bida, enfrentá bida ku positivismo.

Te otro siman ku Dios ke.

Riba roster

Ban sembra huntu edukashon katóliko for di rais. Esaki ta e tema di e siman di skolnan katoliko. Tur hóben i personal di direktiva di skolnan katóliko, a haña un armband, batisá dor di nos Mgr. Luis Secco. Esaki pa kòrda nos tur ku nos fé mester ta den nos Tata pa e keda guia i protehá nos.

Un bunita selebrashon a keda hasi pa skolnan. Kada skol a trese 2 hóben pa representá nan skol den e selebrashon.

E kor di Kolegio Iris Bruynings, bou di direktshon di yufrou Angèle, a kanta masha bunita mes. Nos hóbennan tin talento, nan boso a resoná den Pietermaai i plama asina amor kalor i e mensahé di Kristu Hesus den sentro di Pietermaai.







Not'é riba bòrchi

Pabien na Kolegio Don Sarto ku a presentá nan obra: “Don Sarto ta Skibi”.

Masha danki na Unesco pa e oportunitat bunita aki pa laga nos hóbennan konosé nan talento. Keda pendiente paso nan tin mas na kaminda. Danki na tur dosente, hóbén i tim di maneho pa nan aporte. Mayornan danki pa e konfiansa, boso yunan ta kampion.



(potret for di FB di Minister di Enseñansa)

Den agènda

Fakansi di skol:

Pasku grandi 18 pa 26 di aprel

Dia di obrero 1 di mei

Riba rapòrt

Hóbennan di st. Paulus VSBO a partisipá na TRANSFORMER. E hóbennan ku a partisipá ta Daniel Hamoud, Fausen Bernadina, Albin Soleana en Cubilete Espinal. Nan Coach tabata Jason Vic.

Komo proyekto nan a drecha un kas di un famia ku a kima. Nan mes a traha riba nan fondonan. Nan mes a basha e fundeshi i lanta muraya di e kas. Pa por yega na fondo nan a organisá un kontest di RAP i a invitá famia i bisñanan pa nan por pasa un ratu agradabel huntú. Maske nan no a bai ku e premio de TRANSFORMERS, nan tabata kampion. Henter de personal i studiantenan di st. Paulus VSBO ta masha orguyoso di e hóbennan aki. Pabien...sigui briya hóbennan.





Mucha djispou

Den lès di ingles

Mener: "Kiko ta kacho na Ingles"

Fin: "DOG"

Mener: "Hopi bon, awor kiko ta veterinario na ingles"

Fin: "Fásil, esei na ingles ta Dogter"